

**PRAVILA PROŠIRENOG OSIGURAVAJUĆEG POKRIĆA ZA ODŠTETNE
ZAHTJEVE LICA KOJA SE NE SMATRAJU TREĆIM LICIMA
-AO PLUS-**

UVODNE ODREDBE

Član 1.

[1] U ovim Pravilima pojedini izrazi imaju sljedeće značenje:

- 1] **Osiguravač** – Adriatic osiguranje d.d.
- 2] **Korisnik** - vozač koji u skladu sa propisima, upravlja motornim vozilom, a pretrpio je tjelesne povrede u motornom vozilu na koje se odnosi ovo osiguranje;
- 3] **Srodnik korisnika** - ono fizičko lice koje bi, uslijed udesa sa smrtnom posljedicom po korisnika moglo ostvariti, kao oštećeni, svoje pravo na nadoknadu štete prema uzročniku udesa;
- 4] **Osnovno osiguranje** - osiguranje od auto-odgovornosti sklopljeno kod Adriatic osiguranja (u daljnjem tekstu Osiguravač) uz koje se sklapa ovo osiguranje.
- 5] **Motorno vozilo** - je svako vozilo za koje se može ugovoriti osnovno osiguranje.

OBIM POKRIĆA

Član 2.

- [1] Osiguravač se obavezuje nadoknaditi štetu, koju zbog tjelesnih povreda pretrpi korisnik prilikom upravljanja motornim vozilom i to u slučaju njegove krivnje za nastalu saobraćajnu nezgodu. U slučaju udesa sa smrtnom posljedicom korisnika, Osiguravač će zbog smrti korisnika nadoknaditi štetu njegovim srođnicima.
- [2] Suma osiguranja iznosi **50.000 KM** i predstavlja gornju granicu obaveze Osiguravača za sva davanja po jednom štetnom događaju bez obzira na vrstu motornog vozila za koje je zaključeno ovo osiguranje.
- [3] U slučaju da vozač motornog vozila umre od posljedica ostvarenja osiguranog slučaja, Osiguravač se obavezuje da će novčano nadoknaditi troškove pogreba prema mjestu u kojem su ti troškovi nastali (prema mjesnim običajima), a najviše do **6.000 KM**, licu koje dokaže da ih je snosilo, bez obzira na do tada isplaćeni novčani iznos vozaču vozila na ime naknade za nematerijalnu štetu, s tim da ukupni iznos naknade za nematerijalnu štetu i troškove pogreba ne može biti veći od **50.000 KM**. Lice kome se isplaćuju troškovi pogreba, dužno je dokazati postojanje uzročne veze između osiguranog slučaja i smrti vozača.
- [4] Naknade iz bilo kojeg osiguranja nezgode ne ubrajaju se u davanja pokrivena ovim osiguranjem.
- [5] Naknada za nematerijalnu štetu je strogo lična, te se prava ne mogu nasljeđivati.

UTVRĐIVANJE PREMIJE OSIGURANJA

Član 3.

- [1] Premija osiguranja za prošireno pokriće (AO plus) od iznosa premije osnovnog osiguranja umanjene za bonus odnosno uvećane za malus iznosi :
 - 1] **5 % za teretna vozila, autobuse i vučna vozila;**
 - 2] **10% za sve ostale grupe vozila za koje je moguće zaključiti prošireno pokriće (AO plus).**

ISKLJUČENJE IZ OSIGURANJA

Član 4.

- [1] Osiguravač ne nadoknađuje štetu ukoliko je do nje došlo:
 - 1] u vožnji obavljenoj bez znanja i odobrenja imatoca vozila ili od strane neovlaštene osobe (oduzimanje vozila i sl.).
 - 2] u vožnji u času razbojničkih radnji i sl.
 - 3] prilikom prijevoza nuklearnih i drugih radioaktivnih tvari ako su tjelesne povrede izravna ili neizravna posljedica dijeljenja jezgra ćelije ili zračenja tih materija.

- [2] Ovim Pravilima ne pokriva se šteta korisniku niti srođnicima korisnika koji imaju pravo naknade štete po osnovu obaveznog osiguranja automobilske odgovornosti.
- [3] Naknada štete za strah je isključena.
- [4] Šteta zbog oštećenja stvari, uključujući garderobu i ličnu prtljagu nije pokrivena ovim osiguranjem.
- [5] Ako nije plaćena posebna premija nije pokrivena šteta, ako je do nje došlo kod sudjelovanja na trkama radi postizanja najvećih ili najvećih prosječnih brzina, reli-takmičenja, na vožnjama za postizanje najvećih brzina na tvorničkim dvorištima, auto-dromima i drugim, za tu namjenu određenim stazama.

GUBITAK PRAVA IZ OSIGURANJA

Član 5.

- [1] Korisnik motornog vozila gubi prava iz proširenog osiguranja ukoliko je do štete došlo iz razloga navedenih u članu 3.stav 1. Uslova osiguranja od automobilske odgovornosti (osnovnog osiguranja).

TERITORIJALNA VAŽNOST OSIGURANJA

Član 6.

- [1] Prošireno osiguranje (AO plus) sklopljeno po odredbama ovih Pravila odnosi se i na štete nastale u zemljama članicama Sistema međunarodne zelene karte.

PROMJENA VLASNIKA MOTORNOG VOZILA

Član 7.

- [1] U slučaju promjene korisnika, odnosno vlasnika motornog vozila, prošireno osigurateljno pokriće (AO plus) ostaje na snazi kao i osnovno osiguranje, bez prava iz počeknog roka.

OSTALE ODREDBE

Član 8.

- [1] Na prošireno osigurateljno pokriće primjenjuju se Uslovi osiguranja od automobilske odgovornosti, ako nisu u suprotnosti sa ovim Pravilima.
- [2] Kod tumačenja ugovora, pravni propisi o naknadi štete osnovnog osiguranja primjenjuju se kod određivanja visine štete u proširenom osigurateljnom pokriću, ukoliko ovim Pravilima nije drugačije ugovoreno.

NADLEŽNOST U SLUČAJU SPORA

Član 9.

- [1] U slučaju spora između korisnika osiguranja, odnosno srođnika korisnika osiguranja i Osiguravača, nadležan je sud prema mjestu sklapanja ugovora o osiguranju.

PRIJELAZNE I ZAVRŠNE ODREDBE

Član 10.

- [1] Ova Pravila stupaju na snagu i primjenjuju se od 25.04.2005. godine.